

IBADER

*Instituto de Biodiversidade
Agraria e Desenvolvemento Rural*

V Edición dos Premios “Rafael Crecente” a Iniciativas Innovadoras de Xestión Territorial

Páxina | 1

Convocado polo Instituto de Biodiversidade Agraria e Desenvolvemento Rural (IBADER) da USC, coa colaboración do Laboratorio do Territorio da USC.

O profesor Rafael Crecente Maseda (1964-2015) estaba considerado como un dos grandes expertos en xestión territorial de Galicia.

Foi profesor titular do Departamento de Enxeñaría Agroforestal da Escola Politécnica Superior da Universidade de Santiago de Compostela, e o seu labor estivo vinculada principalmente á investigación, sendo director do Laboratorio do Territorio e coordinador do Sistema de Información Territorial (SIT) desta universidade. Así mesmo, participou activamente como investigador en países de Latinoamérica, fundamentalmente en Ecuador - lugar no que impulsou un programa de colaboración, así como en convenios con países de Europa central e do leste. Tamén foi consultor da oficina rexional da FAO en Budapest, profesor convidado na Universidade de Múnic e investigador do IBADER adscrito ao Grupo de Investigación 1934 Territorio-Biodiversidade.

Na súa homenaxe, creáronse estes premios para impulsar a formulación e aplicación práctica de ideas innovadoras relacionadas co desenvolvemento rural, a conservación do medio ambiente ou a mellora da xestión territorial.

Con estas bases publícase a quinta edición destes premios, que se convocan anualmente ao comezo de cada curso académico, e que se publicitan a través das canles institucionais da Universidade de Santiago de Compostela e outros medios de difusión que se consideren oportunos.

BASES DA CONVOCATORIA 2021-2022:

1. Obxectivo

Estes premios teñen como obxectivo impulsar a formulación e aplicación práctica de ideas innovadoras relacionadas co desenvolvemento rural, a conservación do medio ambiente ou a mellora da xestión territorial en sentido amplo en Galicia.

IBADER

*Instituto de Biodiversidade
Agraria e Desenvolvemento Rural*

2. Participantes

Poderán participar nesta convocatoria todas aquelas persoas que finalizaron a súa titulación universitaria de Grao ou Máster nos últimos 5 anos, tomando como referencia a data límite de entrega de propostas ao presente premio.

3. Carácter dos premios

Concederanse dous premios, un primeiro e un segundo, co recoñecemento formal a través dun diploma acreditativo e unha contía económica de 2.000'00 € e 1.000'00 € respectivamente. A dotación do premio farase a través da partida orzamentaria do IBADER 6095-2416-64000.

As propostas premiadas poderán difundirse parcial ou completamente a través dos medios de difusión que se designen polos organizadores do premio.

4. Prazos

Con data de 28 de setembro de 2021 abriuse o primeiro prazo para presentación de propostas sendo o 31 de xaneiro de 2022 a data límite para a recepción de candidaturas. O devandito prazo para a presentación de candidaturas estendeuse ata o **30 de Setembro de 2022**.

O fallo, emitido polo Consello Científico do IBADER, farase público no transcurso do mesmo ano académico coincidente coa convocatoria. O acto formal de concesión dos premios terá lugar en data e lugar que serán anunciados oportunamente.

5. Presentación das propostas

As persoas candidatas deberán enviar unha proposta innovadora no ámbito do desenvolvemento rural, a conservación do medio ambiente ou a mellora da xestión territorial ao correo electrónico *premio.rafaelcrecente@usc.es*, en formato pdf.

As propostas poderán ser ideas orixinais, ou baseadas en iniciativas ou traballos preexistentes. Neste caso, as propostas candidatas terán que salientar o seu carácter novo, explicando onde reside a compoñente de innovación e en que medida a proposta contribúe a iniciativa máis aló do xa existente.

Aínda que os premios buscan ideas innovadoras que poidan inspirar e mellorar a xestión territorial en Galicia, o ámbito das propostas non se circunscribe á devandita comunidade autónoma. Neste sentido acéptanse propostas de fóra deste territorio, a condición de que se detalle e faga referencia explícita á súa aplicabilidade e/ou viabilidade para o contexto galego. Por exemplo, indicando en que medida a proposta é replicable en Galicia, cal pode ser a achega da idea ao contexto galego, que factores poden favorecer ou dificultar a súa aplicabilidade, etc.

IBADER

*Instituto de Biodiversidade
Agraria e Desenvolvemento Rural*

A memoria explicativa terá unha extensión máxima de 50.000 caracteres, sen contar os espazos, e tamaño A4. Poderá presentarse en galego ou castelán, e incluírá un resumo en galego, castelán e inglés dun máximo de 150 palabras. As persoas candidatas solicitarán confirmación da correcta recepción do documento.

Complementariamente á memoria descrita no parágrafo anterior, as persoas candidatas deberán achegar á mesma unha ficha resumen de dúas páxinas, tamén en A4, na que se faga unha breve descrición do proxecto de forma esquemática e visual, incluíndo diagramas, fotografías ou outros elementos gráficos de apoio. Dita ficha resumo terá unha finalidade divulgativa.

Así mesmo, e para fins de difusión e divulgación, os candidatos deberán achegar unha ou dúas imaxes ilustrativas ou representativas da proposta, que se facilitarán en formato png ou jpg/jpeg, Neste sentido, prefírese unha fotografía no canto dunha ilustración ou figura, e en ningún caso debe haber textos sobreimpresos sobre as imaxes facilitadas.

Finalmente, deberase cumprimentar o formulario que se adxunta no Anexo I da presente convocatoria, indicando os datos persoais dos participantes, e achegar un *curriculum vitae* resumido de dúas páxinas de extensión máxima, no que conste expresamente a denominación e a data de obtención do título universitario co que acceden á convocatoria.

6. Criterios de valoración

Valoraranse a viabilidade práctica da idea ou proxecto innovador, é dicir, a súa aplicabilidade, o impacto na sustentabilidade territorial e a xestión dos recursos en Galicia, e que teña compoñentes de innovación social, por exemplo, no ámbito da xestión da propiedade. Así mesmo, valorarase a calidade expositiva e a claridade da memoria.

No caso de propostas non orixinais, considerarase de relevancia a achega á iniciativa existente e compoñente de innovación, a cal debe contribuír aos mesmos fins: aplicabilidade, o impacto na sustentabilidade territorial e a xestión dos recursos en Galicia.

Con respecto aos traballos de ámbitos territoriais alleos ao galego, a maiores do anterior, terase en conta a viabilidade e aplicabilidade en Galicia.

7. Comité avaliador

O Consello Científico do IBADER desempeñará as funcións de comité avaliador das propostas, podendo solicitar o asesoramento dunha Comisión Externa de expertos, que trasladará as súas propostas a este Consello Científico.

IBADER

*Instituto de Biodiversidade
Agraria e Desenvolvemento Rural*

Este Consello Científico terá a potestade de interpretar as bases da convocatoria, así como de determinar o modo correcto da súa aplicación no desenvolvemento destes Premios, tomando as decisións que considere oportunas.

O Consello Científico aprobará unha lista priorizada dos traballos presentados, indicando nela os correspondentes ao primeiro e segundo premio. Así mesmo, á vista da calidade dos traballos, poderá formular unha mención honorífica a aqueles que considere de especial interese. O ditame do Consello Científico será comunicado aos participantes. As decisións deste Comité avaliador serán inapelables.

Ante a publicación do fallo do concurso por parte do Consello Científico do IBADER, que esgota a vía administrativa, poderase interpor recurso contencioso-administrativo ante o xulgado do contencioso-administrativo de Santiago de Compostela no prazo de dous meses a contar desde o día seguinte á data de publicación oficial no taboleiro de anuncios electrónico, de conformidade cos artigos 46 e 8 da Lei da Xurisdición Contencioso Administrativa, aprobada por Lei 29/1998, do 13 de xullo. No entanto, os interesados poderán interpor recurso potestativo de reposición no prazo dun mes ante o órgano que o ditou. Neste caso non se poderá interpor o recurso contencioso-administrativo anteriormente indicado en tanto non recaia resolución expresa ou presunta do recurso administrativo de reposición, ao amparo dos artigos 123 e 124 da Lei 39/2015, de 1 de outubro, de Procedemento Administrativo Común das Administracións Públicas.

8. Dereitos das persoas candidatas

Os dereitos de propiedade intelectual serán dos seus autores con excepción dos dereitos de difusión, que corresponderán ás entidades que convocan este premio.

Así, as entidades que convocan este premio poderán divulgar por calquera medio audiovisual as propostas presentadas e, en particular, a ficha resumen e as imaxes descritas no apartado 5 das presentes bases. Indicarase en todo momento a autoría das propostas innovadoras, informando os dereitos de propiedade intelectual asociados ás mesmas.

9. Aceptación das bases

Os participantes aceptan incondicionalmente as bases da presente convocatoria.

Lugo, 12 de Maio de 2022.